

林文忠公政書

附奏新頒夷人治罪專條內請酌易字樣片

再^臣等准刑部咨通行夷人治罪專條內開一
夷人帶有鴉片煙入口圖賣者爲首照開設窩
口例斬立決爲從同謀者絞立決等語在衡情
定議之意以入口二字爲關鍵原因海洋遼闊
口以外直連夷洋口以內始爲內地劃清界址
本極分明惟覈諸粵省貿易章程尙有不得不
防其影射之處緣廣東中路通商向以船進虎
門乃爲入口番船初到之時先於虎門口外寄

梔如擔杆山銅鼓洋大嶼山伶仃洋尖沙嘴仰
船洲琵琶洲上下磨刀沙灣石笋九洲沙瀝潭
仔雞頸等洋皆向准夷船寄泊之所此等洋面
雖皆在老萬山以內而老萬山並無口門無從
稽察是以定例夷船必雇引水小船報明引入
虎門口內停泊黃埔始得開艙驗貨按則納稅
投行互市其在虎門以外寄泊中路各洋者皆
未入口之船也而私售鴉片之弊正在於此蓋
由中路而東而北則歷潮州南澳以達閩浙北

洋凡甯波上海山東天津奉天之商船皆所通行由中路而西則本省之高廉雷瓊船隻往來亦絡繹不絕所有各路興販鴉片多在洋面舟次與夷人交易盤運過船卽或在口內議買亦須赴口外運貨此內地快蟹拖風等艇所以乘間出沒而夷人囤貯鴉片之躉船常泊伶仃等洋職是故也口內夾帶鴉片者無非民船向來挈獲之案厯厯可據若夷船夾帶入口雖亦難保必無然經總散各洋商逐層保結又於入口

之後卽行開艚起貨立見底蘊故夷人所帶鴉片每先卸於口外躉船然後入口今若以是爲界彼正得以藉口趨避難保不於虎門口外再設躉船恐辦理又形棘手且暎國領事義律於繳煙完竣之後曾據具稟懇求在澳門裝貨_臣等以其顯違定例批駁不准該領事尙懷觀望是以近日他國之船進黃埔者已有十四隻而暎咭喇所屬港腳之船尙停虎門口外之尖沙嘴一帶支飾遷延_臣等惟飭師船嚴密防範一

面示諭各夷船如無鴉片卽應入口報驗有鴉片而首繳淨盡者亦准入口若自揣不敢報驗卽日揚帆回國亦尙可免窮追倘透漏售私萬難曲宥此時該夷正在憚於入口故口外之弊比之口內尤當嚴防可否仰懇

聖裁將新例入口字樣酌易爲來內地等字稍示渾涵俾無可以藉口之處恭候

命下祇遵等爲夷情狡猾加意周防起見不揣冒昧合詞附片瀆陳伏祈

聖鑒訓示謹

奏

會奏巡緝營員訪有劣蹟請革審摺

奏爲原派巡緝營員於撤巡後訪有劣蹟請

旨革職審辦恭摺奏祈

聖鑒事竊照廣東各海口國販鴉片偷漏紋銀久已
積爲弊藪而港澳叢雜防範難周是以向設巡
船分投查緝旣不能不派委備弁亦不能不雇
用眼線但其中奉公守法者緝捕多非所長而
破案得力者又難保別無私弊惟有信賞必罰
懲勸兼施獲犯旣多固未便沒其勞績一有弊

實卽不敢稍予姑容蓋此輩駕馭之難各省皆然而尤莫甚於粵東諸案皆然而尤莫甚於鴉片也卽如前任兩廣督臣盧坤任內揭設巡船維時副將秦裕昌以捐職都司王振高帶領壯丁徐廣素請捕務稟准隨船巡緝先後獲犯多名經盧坤將王振高飭發香山協水師効力並賞給徐廣記委頂戴嗣升任撫臣祁墳兼署督篆復於掣獲盜犯潘亞有等案內奏奉

諭旨王振高著該督留心察看如果一二年後再著

勞績卽奏請以都司補用欽此臣鄧廷楨抵任後
因王振高尙須察看當發陸路南韶連鎖差委
旋經部駁仍發水師効力並未派令巡查嗣因
捕務緊要修復巡船以資緝匪據署臣標中軍
副將韓肇慶派委守備戴文彪千總蔣大彪倫
朝光仍帶記委徐廣壯丁梁恩陞等往來外海
內河巡查緝捕先後挈獲載運紋銀出洋販賣
鴉片以及鹽梟土盜各犯共二百六十五名起
獲紋銀番銀共六萬二千六百餘兩煙土一萬

六百餘箱均經

奏報題咨在案除戴文彪奉部簽陞江西都司今已病故外倫朝光蔣大彪以疊獲紋銀先後

題陞守備梁恩陞亦以獲犯勞績拔補外委嗣於

十七年秋間臣鄧廷楨與前撫臣祁埴承准

廷寄因有人陳奏王振高徐廣卽赤沙廣梁忠卽

梁恩陞等暗開窯口等因

諭旨查究當經欽遵密查實無開設窯口憑據合詞

恭摺覆

奏並附片瀝陳此等用以緝捕本屬棄短取長仍
不時留心察看如查有弊端卽從嚴懲辦不敢
稍存迴護荷蒙

聖鑒各在案此後臣鄧廷楨更加留心察看雖據報
挈獲鴉片贓犯絡繹不絕而獲銀之案較前頓
少因思巡船出赴外海究恐稽察難周安知不
恃特委之名藉端嚇詐且慮各處營縣因有另
設巡船轉相觀望遂於十八年撤去前項巡弁
以專營縣責成一面追查從前委巡之王振高

及近年之蔣大彪等，有無假公濟私，尙未得有實據。臣林則徐奉

命來粵密訪海洋利弊，知先後管駕巡船之弁丁，以及眼線人等多不理於人口，而亦未得確憑。迨五月內，銷化夷船煙土事竣，由虎門回至省垣，訪得前在巡船充當頭舵之馮亞潤、周亞保等，併挈到案，提同當作眼線之已革外委保安泰，隔別研訊。據供：巡船挈獲販煙運銀各案匪犯，俱在水次截挈人賊，並獲並無妄挈邀功挾嫌。

裁害情弊惟所解煙土如有零星餘剩各船間
或勻分若在偏僻口門遇著販煙之船亦有送
給洋銀聽其開去等語是侵匿賄縱之弊已屬
顯然臣等立提王振高倫朝光梁恩陞徐廣反
覆詰訊雖不敢盡行狡賴而供詞尙多閃爍且
因守備蔣大彪引

見未回倫朝光等率皆該諸蔣大彪一人其爲前此
通同舞弊現在推卸避就尤可概見當此力除
鴉片之際正須肅清捕務杜絕欺朦臣鄧廷楨

先因各該弁獲犯多名雖經隨案聲請

恩施予以升擢今既查有劣蹟愧恨交深必當倍加嚴辦斷不敢意存廻護稍予姑容致負

聖明委任除外委梁恩陞記委頂帶徐廣均已由臣鄧廷楨斥革並將王振高捐納都司職銜咨部革退一面行文前途截掣蔣大彪回粵聽審外相應請

旨將准陞水師提標後營守備蔣大彪順德協右營守備倫朝光一併革職以便提同各犯證嚴審

確情按擬懲辦以爲備弁營私者戒臣等謹會
同水師提督臣關天培合詞恭摺具

奏伏乞

皇上聖鑒訓示謹

奏

會奏暎夷抗不交克嚴斷接濟查辦情形摺
奏爲暎咕喇國領事義律因求在澳門裝貨不准
輒將該國貨船阻留口外圖賣新來鴉片適有
夷人毆斃華民命案抗不交克照例斷其接濟
並勒兵分堵海口該夷與奉逐各奸夷均已畏
懼出澳寄住貨船臣等往來香山虎門相機督
辦先將大概情形恭摺奏

聞仰祈

聖鑒事竊臣林則徐奉

命來粵與臣鄧廷楨等宣示

天威夷人咸知震懾前經收繳躉船鴉片二萬餘箱
維時嘆咭喇國領事義律在省城夷館自行查
數報繳前後連具十餘稟情詞均甚恭順臣等
於批諭之中時加稱獎該領事亦自以爲榮頗
形踴躍覈計繳清煙土較原稟溢出尙多論者
以爲嘆夷平日桀驁性成今乃倒篋傾筐帖然
馴伏是千里之重貲盡擲卽百年之痼疾可除
而臣等熟計深籌尤以本年來船夾帶爲慮蓋

該國遠在數萬里外當其開船之日尙未知
天朝新例如此森嚴旣而潛帶而來必思顧其成本
而中國力除巨患正當於得手之際拔盡根株
豈得將新船轉予放鬆致使前功盡棄是以臣
等請定治罪專條並立限期首繳仰荷

聖明俞允飭定新例頒行其新例未到之先各國貨
船卽已陸續到粵當令洋商通事諭知現辦章
程船內無鴉片者進口報驗有鴉片而自首全
行呈繳者准予

奏請免罪並許驗明進口若自揣不敢報驗卽日
揚帆回國亦免窮追使各國夷商得以早定主
見迨頒到新例又復傳諭周知截至七月初八
日進口報驗夷船共一十七隻經粵海關監督
臣豫堃驗明均無鴉片准其開艙貿易不進口
而回國者亦有三隻其中卽有鴉片當不至毒
流內地惟喚咭喇所屬港腳貨船到時本亦卽
擬進口旋被義律阻止停泊虎門口外之尖沙
嘴一帶緣義律爲該國領事該國主給與權柄

得以約束眾夷先前繳土之時力能號召南澳
福建等處之船悉行駛回虎門一體呈繳追繳
完後義律稟辭下澳尙據遞具一稟云違禁犯
賣一弊悞及正經貿易貽累人之家業其害甚
重亟須設法早除此弊於常久如准委員來澳
會同妥議章程其違禁犯賣之弊可冀常遠除
絕等語臣等以爲真心除弊大加批獎並會委
佛山同知劉開域赴鴻與之覈議且將

奏准頒賞之茶葉一千六百四十箱發往給賞以

便空薏迅速回帆詎劉開域未到之先義律於
四月二十四日續遞一稟云本國船隻進埔須
候奉到國主批諭方可明白轉飭或蒙格外施
恩令在澳門裝貨感戴靡旣等語臣等接閱之
下均相詫異始知前稟章程一語乃係別蓄詭
謀蓋澳門孤峙海隅實可周通內地向惟西洋
夷人准設貿易額船二十五隻起卸貨物不納
關稅自明代而已然暎夷惟利是圖久深艷羨
故於繳土之後希圖破例效尤此端一開則粵

海關幾同虛設且溯查嘉慶年間鴉片之浸淫
流毒皆由澳門囤聚發販年盛一年道光二年
葉恆澍犯案始將澳門囤所撤散其後變爲躉
船今躉船之積土甫除若澳門之囤所又起何
異驅虎進狼故不得不決絕批駁且貨船皆從
該國給予牌照令赴內地經商豈有已經到粵
始候該國王批諭之理亦於稟內指破其誑義
律詭計不行聞然消阻委員劉開域到澳伊遂
不理問其定何章程據稱不准在澳裝貨便無

章程可議卽傳領茶葉亦不敢領臣等以此項
奏准給賞原係出於格外旣無福承受卽不值給
發此後凡有批諭伊皆不肯接收在犬羊之性
無常原不必與之計較然有不可聽其觀望者
如繳清煙土之空躉尙有一半未行奉

旨驅逐之奸夷亦有數名未去不能因其不接諭帖
轉任逗留故仍委員赴澳嚴催並飭令西洋夷
目協同攆逐至該國貨船陸續來粵計至此時
已有三十二隻之多該夷商滿載而來將本求

利無不早圖進口開艙貿易乃被義律一人把持阻撓俱在尖沙嘴一帶聚泊廣東天氣炎熱各船中如洋米洋布棉花等貨難免潮濕霉爛業已怨懟同聲臣等令洋商通事齎諭分赴各船剴切開導催令進口咸稱義律係伊國領事不得不惟令是從而其中潛帶鴉片之奸夷既不甘呈繳又不願空回則正樂於遷延冀以私售禁物現因各口查緝嚴緊整箱煙土不能運入內洋而蛋艇漁舟與番船每相貼近乘間買

其零土以圖轉售獲利者節經文武拏獲已據
確切供明且查夷人私放三板裝載鴉片潛赴
偏僻口門以木片爲招帖寫明鴉片一個洋銀
幾圓字樣隨潮流入海口以賤價誘人售買是
義律之勒令夷船聚泊口外仍爲圖賣新來鴉
片恐被進口搜查起見夷情詭譎如見肺肝卽
無別滋事端亦不得容其於附近口門佔爲巢
穴况夷人酗酒打降習以爲常五月二十七日
尖沙村中有民人林維喜被夷人酒醉行兇棍

毆斃命經新安縣梁星源驗明頂心及左乳下
各受木棍重傷訊據見證鄉鄰僉稱係啖咭喇
國船上夷人所毆眾供甚爲確鑿諭令義律交
出兇夷照例辦理將及兩月延不肯交臣等給
與諭函亦竟始終不接竊思人命至重若因啖
夷而廢法律則不但無以馭他國更何以治華
民義律肆意抗違斷非該國王令其如此安可
聽其狂悖而置命案於不辦任奸宄以營私壞
法養癰臣等實所不敢恭查嘉慶十三年啖國

兵頭喇略哩等在澳門違犯禁令欽奉

諭旨卽實力禁絕柴米不准買辦食物等因欽此此時
義律與各奸夷均住澳門前以裝貨爲詞顯有
佔踞之意今更種種頑抗自應遵照嘉慶十三
年之例禁絕喫夷柴米食物撤其買辦工人臣
等於七月初八日駐劄香山縣城勒兵分布各
處要口俾知儆畏仍曉諭在澳華民及西洋各
國夷人以此舉專爲喫夷違犯不得不制以威
與別國均無干涉毋庸驚擾且查例載夷商銷

貨後不得在澳逗留等語今該夷既不進口貿易是不銷貨卽不當住澳應與奉逐各奸夷均照例不准羈留臣等論飭之後澳內西洋夷目亦卽遵諭一同驅逐自七月初九日至十九一句之內義律率其家眷暨奉逐未去之奸夷映頓等並散住澳內映夷共五十七家悉行遷避出澳寄住尖沙嘴貨船及潭仔空蕙船上據署澳門同知蔣立昂香山協副將惠昌耀等稟稱該夷窮蹙倉皇已覺十分兢懼等語臣等察其

平日飲食居處華靡相夸今寄住客船顯有抑
鬱難堪之狀又經禁賣食物雖其船內糗糧不
乏而所嗜之肥腴燔炙日久必缺於供且洋面
不得淡水須於山澗汲泉若汲道俱斷此一端
卽足以制其命彼貿易斷不肯歇手眾夷正不
得齊心要令就我範圍似已確有把握惟倔强
之性未嘗稍受折磨此番控馭周防尙不免稍
需時日而欲永杜鴉片之害實以此爲喫緊機
關未便稍涉游移復貽後患查潭仔與澳門相

近而尖沙嘴則與虎門相近臣等酌商調度擬
往來於香山虎門之間或合或分自當隨時妥
辦既不敢冒昧以愼事亦不敢示弱以長驕必
俟交出克夷掃淨煙土貨船進埔報驗空蕩悉
數開行一切恪遵法度然後給還買辦工人仍
准住行住澳凡在粵東士庶既知夷人習爲虛
憚並知臣等慎密修防沿海間閭現俱十分安
謐堪以仰慰

聖懷謹將辦理大概情形會同廣東巡撫臣怡良水

師提督臣關天培粵海關監督臣豫堃合詞恭

摺具

奏伏祈

皇上聖鑒謹

奏

會奏九龍洋面緝擊夷船情形摺

奏爲喚夷義律於出澳後率領該國夷船以索食
爲名突向師船開礮經參將賴恩爵等奮勇抵
禦大挫其鋒該夷旋向澳門同知投遞懇求說
帖並託西洋夷目代爲轉圜臣等仍當相度機
宜酌籌勦撫先將現辦情形恭摺奏祈

聖鑒事竊照喚咭喇國領事義律前因求在澳門裝
貨不准輒將該國新來貨船阻留尖沙嘴洋面
圖賣鴉片並主令奸夷空躉任意逗遛又命案

抗不交兇給諭亦不接受是以臣等斷其接濟並勒兵分路嚴防義律與住澳各暎夷悉行遷避出澳經臣等於七月二十四日會摺具

奏在案嗣知被逐奸夷多住尖沙嘴船上臣林則

徐_臣鄧廷楨當卽移駐虎門就近調度臣關天

培自七月以來常在沙角洋次督領本標師船與調到之陽江碣石兩鎮舟師排日分合操練以振軍威並加派弁兵協防排鍊添雇水勇裝配火船以備隨時調遣旋據探報義律將該國

貨船中挑出船身較大之喇呢喇吐等船兩隻
及屢逐未出之空躉數隻一併湊集礮械假扮
兵船又有自夷埠新來之兵船一隻番梢礮械
較多拋泊各夷船之前恃爲保護臣等於各路
水陸要口雖已嚴密佈置不使一處空虛仍諄
諭領兵各員不得輕舉肇衅原冀義律早知悔
悟果能交兇繳土將貨船陸續進關卽可撤去
兵防照常貿易詎七月二十九日接據大鵬營
參將賴恩爵稟稱該將帶領師船三隻在九龍

山口岸查禁接濟防護礮臺該處據尖沙嘴約
二十餘里七月二十七日午刻義律忽帶大小
夷船五隻赴彼先遣一隻攏上師船遞稟求爲
買食該將正遣弁兵傳諭開導間夷人出其不
意將五船礮火一齊點放有記名外委之兵丁
歐仕乾彎身料理軍械猝不及防被礮子打穿
脇下殞命該將賴恩爵見其來勢兇猛亟揮令
各船及礮臺弁兵施放大礮對敵擊翻雙桅飛
船一隻在旋渦中滾轉夷人紛紛落水各船始

退少頃該夷來船更倍於前復有大船攔截鯉魚門礮彈紛集我兵用綢紗等物設法閃避一面奮力對擊瞭見該夷兵船駛來幫助該將弁等忿激之下奮不顧身連放大礮轟擊夷人多名一時看不清楚但見夷人急放三板下海撈救時有兵丁陳瑞龍一名手舉鳥槍斃一夷人被回礮打傷陣亡殆至戌刻夷船始遁回尖沙嘴計是日接仗五時之久我兵傷斃者二名其受傷重者二名輕者四名皆可醫治師船間有

滲漏桅篷亦有損傷均卽趕修完整嗣據新安
縣知縣梁星源等稟報查夷人撈起屍首就近
掩埋者已有十七具又漁舟疊見夷屍隨潮漂
淌撈獲夷帽數頂並查知假扮兵船之船主嘔
噁喇吐手腕被礮打斷此外夷人受傷者尤不
勝計自此次對仗以後巡洋舟師均恨奸夷先
來尋衅巡緝愈嚴八月初五日寅刻守備黃琮
等率領兵勇在潭仔洋面偵見蝦笏小艇靠攏
夷船一隻帶同引水認明係屢逐未去之明嘑

哪薙船知又潛賣鴉片當卽上前查拏該薙船
水手數人卽先跳入小艇飛槳逃竄其在船之
人正欲開礮經黃琮等先擲火斗火礮船中火
發衆夷始行走出除梟水登岸外獲解伙長工
人二名現飭審究該叻叻哪薙船亦卽被火燒
燬並無傷人各據稟報前來臣等查暎夷欺弱
畏強是其本性向來師船未與接仗祇係不欲
釁自我開而彼轉輕視舟師以爲力不能敵此
次乘人不覺膽敢先行開礮傷害官兵一經奮

力交攻我兵以少勝多足使奸夷膽落卽空蕞
屢驅不去故智復萌一炬成灰亦可懲一儆百
正在察看該夷動靜以籌操縱機宜茲八月初
九日接據署澳門同知蔣立昂等稟稱初七日
義律潛至澳門該同知等聞信正欲驅逐旋據
西洋夷目代遞義律說帖一紙內寫嘆咭喇國
領事義律敬字上澳門軍民府大老爺清鑒義
律在粵有年每奉大憲札行辦事無不認真辦
理而此次豈有別心乎蓋義律所求者惟欲承

平各相溫和而已謹此奉知等語並據西洋夷
目以義律懇求伊等代爲轉圜欲請該同知訂
期與該夷目面商會議明定章程義律仍已回
船不敢留澳等情臣等覈其帖內雖無狂悖語
句第自謂認真辦事而竟潛賣鴉片庇匿兇夷
自謂豈有別心而以索食爲名先行開礮是其
言又安可遽信然旣經此番摧挫其懷畏之狀
亦已情見乎詞在臣等所責其遵令而行者亦
不過繳土交兇貨船進口等事並非苛以所難

究竟西洋夷目所請代爲稟商之處是否卽能
將此數事遵照辦理抑或另有干求臣等已批
飭署澳門同知蔣立昂於會議後縷晰稟陳以
憑覈辦此後義律果能恪循法度不越範圍自
當宣布

皇仁寬其既往若萬不得已仍須制以兵威臣等亦
已密定機宜蓄養精銳於山海形勝逐一詳細
講求且察看水陸官兵似亦皆能用命總期上
足以崇

國體下足以懾夷情不敢稍畏一日之難致貽百
年之患以仰副

聖主恩威並濟中外兼綏之至意除俟籌議覆到覈
明准駁再行具

奏外所有現辦情形謹合詞恭摺具

奏伏祈

皇上聖鑒再廣東沿海間閭仍俱十分靜謐各國貨
船照常進口計自本年五月至今已進二十五
隻合併聲明謹

奏

會奏巡閱澳門情形摺

奏爲會同巡閱澳門抽查華夷戶口傳見西洋夷
目宣示

德威恭摺具

奏仰祈

聖鑒事竊照廣東澳門一區在廣州府香山縣之東
南距縣治一百三十餘里東西南三面環海惟
北面陸路可達縣城自縣城南行一百二十里
曰前山寨設有海防同知暨前山營都司駐劄

再迤南十五里建有關牖一座駐兵防守爲扼
吭拊背要區出關卽入澳境溯自前明許西洋
夷人寄住歲輸地租銀五百兩由香山縣徵收
澳內營造夷樓棟宇相望並建礮臺六座以防
他夷其房屋除西夷自住外餘皆賃給別國夷
人居住而以暎咭喇國爲較多西夷挈眷而居
厯今三百餘年踐土食毛幾與華民無異雖素
稱恭順不敢妄爲而旣與各島夷朝夕往來卽
難保無牟利營私售賣鴉片情事本年臣林則

徐奉

命來粵與

臣

鄧廷楨悉意商酌以躉船雖在外洋而

澳門實爲夷商聚集之所且其間華夷雜處漢
奸勾串尤多若不從澳門清源則內外綫索潛
通仍恐漸成弊藪是以於四月間檄委署佛山
同知劉開域署澳門同知蔣立昂香山縣知縣
三福署香山縣縣丞彭邦晦仿照編查保甲之
法將通澳華民一體按戶編查毋許遺漏並督
同該夷目搜查夷樓有無屯貯鴉片旋據該員

等查明戶口造冊呈送計華民一千七百七十
二戶男女七千零三十三丁口西洋夷人七百
二十戶男女五千六百一十二丁口暎咭喇國
僦居夷人五十七戶並查明虎門收煙之時有
暎夷咽噤吐將躉船煙土偷運八箱入澳被西
洋夷目查拏將原土押交暎國副領事參遜一
體呈繳又據稟該夷目自行拏獲夷人啞噤噤
零煙在馬頭焚燒將啞噤噤收監按照夷法問
罪出具此外並無存貯煙土甘結稟請親臨查

辦前來臣等因驅逐暎國住澳奸夷由省移駐香山遂於七月二十五日自香山起程二十六日清晨統領將備管帶弁兵整隊出關該夷目噉噉嗎哋哋率領夷兵一百名迎於關下兵總四人戎服佩刀夷兵肩鳥槍排列道左隊內蕃樂齊作俟臣等輿衛行過兵總導領夷兵蕃樂隨行至新廟夷目噉噉嗎哋哋具手版稟謁命之進見該夷免冠曲身意甚恭謹臣等宣布

恩威申明禁令諭以安分守法不許屯貯禁物不許

狗庇奸夷上負

大皇帝撫綏懷柔至意該夷點頭領會據向通事聲稱夷人仰沐

天朝養二百餘年長保子孫共安樂利中心感激出於至誠何敢自外生成有干法紀現在隨同官憲驅逐賣煙奸夷亦屬分內當爲之事等語以手拄額者三敬謹退出臣等當卽賞以絹扇茶糖並頒賞夷兵牛豕麪腊數十事番銀四百圓再辭乃受臣等卽入三巴門經三巴寺關前

街娘媽閣至南灣督率隨員抽查夷樓民屋於
與冊造相符其賃給喫夷房間自各夷離澳後
現俱關閉覆加訪察自春間查辦以後該西洋
夷樓實無存貯煙土情事隨由南灣仍回前山
所有經過三巴媽閣南灣各礮臺俱發一十九
礮詢之澳人稱係該國大禮以示尊敬不輕舉
行兵總率領夷兵送至關牐始行撤退_上等沿
途察看不但華民扶老攜幼夾道歡呼卽夷人
亦皆疊背摩肩奔趨恐後恬熙景象

轉載同深此臣等巡視澳門之實在情形也臣等伏思夷人心性反覆靡常挾詐懷私事所時有如果始終馴伏固當撫之以恩若使微露矜張卽當繩之以法此次因查辦鴉片執法綦嚴澳夷震懾

天威是以倍形恐順惟該處華夷叢雜最易因緣爲奸應請於每年秋間查照現在編查之法檄飭澳門同知督同香山駐澳縣丞編查一次造冊通詳再由督撫兩司分年輪替前往抽查如有

澳夷屯販禁煙及庇匿別國賣煙奸夷等弊卽
行隨時懲辦以清弊藪而靖夷情似於邊徼防
維不無裨益是否有當謹合詞恭摺具

奏伏乞

皇上聖鑒訓示謹

奏

會奏諭辦暎夷情形摺

奏爲暎夷領事義律請將現泊粵洋夷船聽官搜
查出具實無鴉片切結其命案兇夷亦願懸賞
察究並奸夷空薙均請勒限逐回謹將臣等諭
辦情形恭摺奏祈

聖鑒事竊臣等前因暎夷種種違玩照例斷其接濟
不許住澳該夷旋向九龍師船覓食先行開礮
我軍奮力回擊大挫夷鋒復將逗留賣煙之薙
船燒燬一隻該夷領事義律急向澳門同知遞

字懇求並託西洋夷目代爲轉圜臣等當將相機勦撫緣由於八月十一日恭摺奏

聞在案臣等復思義律所遞之字似知悔罪輸誠然僅託諸空言尙未見於實事保非暫作緩兵之計別生譎詐之謀益當整肅軍威嚴防靜鎮一面仍給諭帖責令呈繳新煙勒交兇手並將繳清煙土之空藁奉

旨驅逐之奸夷速飭全行回國卽令署澳門同知蔣立昂傳諭去後茲疊據蔣立昂稟覆八月十五

日義律送給回信內稱接到軍民府來文轉發
大人傳諭條款領事極欲欽遵

聖旨將違禁之鴉片全行絕除自應卽赴澳門敘論
以憑貴憲稟覆等語十七日義律至澳門與西
洋夷目同見蔣立昂復經該署同知將臣等諭
內各條嚴切面諭據通事傳譯義律口稱前因
冒犯嚴威疊奉諭飭業已悔悟欲求轉乞憲恩
情詞極爲恭謹詰以奉諭條款如何遵辦義律
答稱未敢自行稟覆仍具說帖求爲轉稟隨將

說帖呈出已據逐條登覆蔣立昂因見所覆尙有未協面爲駁飭復據義律添寫一紙統求蔣立昂先行請示蔣立昂卽將原件稟送並請覈示前來臣等查閱所覆各條文義不甚通暢而覈其大義尙屬遵諭奉法不敢抗違如諭繳鴉片一節據其登覆意以該國有帶鴉片之船先已令其回去現泊尖沙嘴各船俱請官憲搜查若有鴉片卽將貨船盡行沒官嗣後在粵貿易夷人與隨時來到之船不論船主商人傭工夥

計俱令逐名出結由義律加具印結方准貿易
未出結者不准開艙永遠照此辦理如不認真
必致自取咎戾等情臣等查暎夷貨船住泊尖
沙嘴不卽進口原爲圖賣新煙起見且節次挈
獲賣煙奸民已據供認在夷船零買確有明證
是其所稱並無煙土之說實不可信若不切實
查辦何能盡絕根株臣等忿激之餘已先與水
師提臣密爲布置將柴草火藥裝配多船擬將
帶煙不繳之船盡予燒燬以除其害然究以未

分皂白不忍玉石俱焚繼又再四熟商計惟臨以重兵逐船搜檢庶可分良莠而示勸懲今該夷自願請搜察其情詞似極切實臣等復又多方訪察蓋該夷因見臣等堅持數月料已無可希圖遂將新到之煙陸續帶回夷埠是以前有夷船三隻先後駛回近日復有三板夷划紛紛開去且挈獲出海買煙奸民彭亞開等訊據供稱伊於八月初旬帶銀前往向買卽據夷船回覆現無鴉片伊卽放空回來等語是現在夷船

已無煙土似非虛誑惟已去之士固可不必窮追而現泊之船必須逐號搜查以昭覈實臣等現又諭令義律將尖沙嘴所泊暎國貨船按其到粵先後挨次親驗其貨物盡行盤至剝船逐件搜查果無夾帶鴉片卽先押送入口本船搬空之後再行備細查明如此則耳目昭彰自無影射掩藏之弊並恐載煙回去夷船利心不死或竟潛赴東西兩路冀圖分銷臣等現又飛飭沿海各營准備師船嚴密防範並由中路抽撥

兵勇跟蹤跣緝如有此等夷船駛至卽行開礮
夾擊務使遣孽肅清至出結一節若論尋常吏
事原恐習爲具文而臣等體察夷情最重信字
是以臣林則徐初次諭令該夷呈繳煙土卽先
揭出此一層迫義律稟繳二萬二百八十三箱
或疑其言未必能踐而深悉夷情者咸決其必
無失信嗣果繳清煙土有贏無絀是其不肯食
言已有明驗今其所擬逐名出結分寫漢文夷
字由該領事加具印結卽係遵照臣等原論辦

理自應准其所請惟查覈所擬出結語句與現
行新例尙不盡符臣等現又寫具結式諭令遵
照繕寫若不如式具結永不准其貿易以此杜
外來之鴉片實足以昭信守於夷情明有範圍
暗有把握非具文所可同日而語也至林維喜
命案據義律稱審得五人酗酒皆無兇殺之罪
又稱當日上岸滋事亦有咪喇嚙人請再細訪
等語當經蔣立昂以此案供證確鑿兇手實係
暎夷之言向其駁詰義律無可置辯遂添寫說

帖一紙聲明懸賞洋銀二千圓報知何人毆斃
憑據倘能發覺卽會官憲代稟等情臣等復查
義律船內現在實有拘押夷犯五名其非有意
匿兇尙屬可信而實情不能審出原亦無怪其
然至咪喇啞人於羣毆林維喜時並不在場不
獨該國夷人稟辯甚明卽岸上各見證供亦如
一旦暎夷獨託漢奸劉亞三等與屍親說和其
爲並無咪喇啞人在場更無疑義臣等諭知義
律以所拘五人中如不能審定正兇何妨送請

天朝官員代爲審明祇當辦一應抵之人其餘仍皆
發回斷不連累如仍自審則再限十日亦必可
以審明毋得再圖延緩此外如空薨回國請候
北風開行被逐奸夷請留兩名在粵皆經蔣立
昂面加駁飭隨又代求回澳理清事件六日內
如數揚帆而去臣等以所請尙在情理爲日亦
屬無多當將此一層傳諭允准仍派委文武在
澳稽查催逐不任踰限並諭西洋夷目一體查
催以上各事宜除俟逐一清釐再行分別覈

奏外所有現在諭辦情形謹會同水師提督臣關
天培合詞恭摺具

奏並繕錄義律原遞說帖恭呈

御覽伏乞

皇上聖鑒訓示謹

奏

覆奏責令夷人出結甫經遵依片

再臣等先於春間收繳煙土之時卽經諭令夷人務卽出具嗣後永不夾帶鴉片切結呈送而該夷均不敢具結繼又多方開導堅執如前且據義律稟稱倘不能不取結則映國人船無奈祇可回國等語臣等當以該夷回國之言並非出自真心不過憚於出結強顏而作此言蓋一經出結則此後稍有夾帶不但本犯罹於重法卽該領事亦不能置身事外是以心切遲疑當

經據實奏蒙

聖鑒在案嗣經御史步際桐條奏以查辦夷船鴉片
雖責以萬分切實之結亦將甘心出具徒開含
混之路等語欽奉

諭旨著林則徐鄧廷楨悉心籌畫務使弊源盡絕永
杜含混之端等因欽此臣等竊思夷人正不敢出
結如可免取最爲省事繼又反覆籌商若竟任
其抗結則夷人夾帶之念斷不能一日忘蓋夷
人最重然諾卽議一事訂一期從不爽約其視

出結之事絕無僅有非比內地公牘結多而濫以致視爲泛常彼愈不肯輕易具結卽愈知其結之可靠亦愈不能不向其飭取是以設法辦理直使該夷計窮心懾至今始克遵依臣等不敢因有人條奏正可藉以自便遂存趨易避難之見致負

委任謹合詞附片覆

奏伏祈

聖鑒謹

奏

會奏暎國躉船奸夷現已驅逐並飭取切結情
形摺

奏爲暎國躉船奸夷現已盡行驅逐其具結進口
貨船查明實無鴉片未進口者飭取切結聽候
查驗方准貿易命案兇手仍須勒兵催交恭摺
奏祈

聖鑒事竊臣等前因暎夷義律阻攔該國貨船庇匿
致命兇手並逗留空躉奸夷當經示以兵威斷
其接濟該夷計窮力絀隨卽悔罪求誠所有節

次傳諭情形歷經奏

聞在案嗣於九月初九日承准軍機大臣字寄欽奉
上諭著林則徐等趁此警動之際力除弊竇所有該
國大小船隻游奕洋面跡有可疑者均著驅逐出
境等因欽此臣等遵查暎國夷船應行驅逐出境
者莫先於躉船自四月間煙土繳清卽經嚴催
回國雖當時已開七隻而其餘尙在遷延總因
該船前泊伶仃囤貯鴉片比之攬載他貨獲利
倍蓰是以觀望徘徊冀俟煙禁或有稍弛之時

復還故業迨八月間巡洋舟師將叫嘯哪龜船
燒燬之後該夷始覺驚慌不敢再圖久泊除賊
咁喇哩二船已賣與咪喇哩夷人改裝貨物又
吐啐咁喇吐二船查已破爛零星折賣外計駛
出老萬山回國空船共二十三隻復查本年春
間臣鄧廷楨

奏明伶仃洋面躉船本係二十二隻今逐回並燒
燬折賣之船合而計之轉多於前奏之數蓋因
收繳煙土時曾經義律將竄往南澳福建各洋

船隻陸續招回此等載煙夷船亦應與躉船一同驅逐故也至應逐奸夷先經臣鄧廷楨

奏明者有嘸哱叱咻咭咭咭三名嗣臣林則徐於嚴驅渣嘸案內

奏明尚有伊弟映嘸及其外甥映哱哱哱哱哱哱管帳哱哱四名均應驅逐又臣等會同密訪復有應逐之咽曦吐噫叱咭等連前統共一十六名飭令一併驅逐節據引水人等按日按名查報某夷附搭某船於某月某日開行某日

出老萬山外回國上下衙門均有報案現在實
已全去此躉船與奸夷均經驅逐淨盡之情形
也至暎夷貨船來粵先被義律阻留不令進口
妄思以此挾制再賣新煙迨見各口查拏緊嚴
難以圖賣每於夜間張帆起碇潛出萬山經臣
等查知大船已去六隻小船約十餘隻其爲將
煙載回夷埠確鑿無疑是以近日情愿搜查明
因煙已離船得以放心無恐惟思夷洋之新嘉
坡新埠等處距粵不過半月海程安知狡獪奸

夷不將鴉片暫行寄頓俟此次搜查畢後再圖
偷運而回所恃以怵其貪利之心者惟賴有

欽頒新例定以斬絞罪名自奉到部文通行宣示眾
夷咸有戒心臣等先於收繳煙土之時卽經飭
取生死甘結該夷堅不肯具蓋以繳煙係一時
之事尙可藉以求生而具結乃長遠之事適恐
自陷於死也然彼所畏憚者在此則我所以制
馭之者亦正在此故臣等不敢藉詞中止亦不
敢畏難苟安相持數月以來直至逐出澳門斷

其接濟且值礮擊火燒之後該夷始愿具結惟結內但云如有鴉片將貨物盡行沒官而於人卽正法字樣仍不肯寫所以臣等前摺

奏明另頒結式飭令遵照繕繳當飭印委各員率同洋商通事傳諭去後不但義律多方退縮而且各船船主貨主併爲一詞以爲性命攸關倘有水手私帶些微恐遭連累抑或兵役栽贓誣指難以辯冤臣等復諭以水手等係夷商應管之人本宜先自查搜豈能容其私帶至查船有

官作主兵役焉敢裁贓萬一意外遭誣定予訊
明反坐何庸過慮總之不帶鴉片則雖具結不
至加刑若帶鴉片卽不具結亦必處死多方開
導近日始有該國之嚙喇噹啞等船陸續遵式
具結經文武官員於虎門黃埔兩處分別查驗
實無夾帶鴉片情弊當卽妥爲帶引許其開艙
照常貿易現在統計各國已進黃埔之船共有
四十一隻且經粵海關監督臣豫堃驗明各夷
船於貨物之外另帶洋錢來粵買貨現有一百

一十二萬六千餘圓日後更不止此似可爲不
賣鴉片之明證此後遵式具結者悉許進口驗
貨貿易如抗不具結或結不如式之船卽可毋
庸查驗驅令速回似此一律飭遵先使該夷常
懷畏死之心乃足奪其貪利之念而又嚴之以
查驗密之以偵挈正經貿易者加以優待倘有
帶煙發覺立正刑誅總惟一意堅持不因其恫
喝刁難稍爲搖動庶可永除巨患至毆斃林維
喜之兇夷雖據義律稟稱囚禁五人在船而既

不能審出正寃又不肯送出聽審日來並欲解
回該國照依夷例辦理已飭委員等諭令斷不
准行大抵該夷於一切事宜緊一分則就緒一
分鬆一步則越畔一步且其居心叵測反覆靡
常卽如近日雖已具稟求誠而尙有嘩論兵船
一隻來自夷埠名爲護貨實亦不可不防臣等
仍與提臣關天培鼓勵水師官兵靜則嚴防動
則進剿總不稍示柔弱務俾悉就範圍以冀弊
絕害除仰紆

宸厯臣等謹會同廣東巡撫臣怡良水師提督臣關
天培粵海關監督臣豫堃合詞恭摺具

奏伏祈

皇上聖鑒謹

奏